

No Servus, Diener und Habe die Ehre!

Etze kömmt dos

Nej su wos

vu Sömde, n 18. Novembr 2023



Herbert Stumpe

Resilienz

An Oubde, wenn ich su ban Biere sitze, geht mr su ollerlej dorchn Koup. Naichtns guckte ich uf menne Finger und dochte, wiesu sein die Fingernahle ömmr drecksch. Ich ho doch kenn Drajk o menn Händn, wosche mich ou ob und zu - obr ich ho ömmr drecksche Nahle. Obr dou wollte ich jo gor ne drieb schreiben. Wall mr nehmluch ou glei dorchn Koup ging, dos ich ömmr mit su villn Leutn iebns Kreuz kumm wajgn su richtschn Klejnichkejten. Etze grode gieht mr su vill ufn Sejgr. Und dou ho ich ane Fortbildung gemacht iebn Resilienz. Dos wäre ou schunt wiedr su wos, wos mieh nejsn kennte. Wiesu gibts kejne richtschn deutschn Wurte mieh fr söttes Zeug. Mr hon kejne Hausmejstr mieh, nej, mr hon „Facility Manager“. An Reisebieroe frojn se dich nouch denner „Destination“ und ane schiene Kehte is itze a „Assesoir“. Und weil se an Fernsehn immr sohn „Aksesoar“, tu iechs ou folsch schreibn. Wall iech dos su will!

Obr zoricke zu menner Fortbildung: Die sollte halfn, doss ich mich nemieh su ufreg und gucke, doss mrsch gutt gieht. Und dos hout mr ou richtsch gutt getoun. Mr worn ne vill Leute und a jeds hotte Zeit wos zun sohn, und dou musste mr ou sötte Sachn machn, die enn zun Nouchdenkn brengn totn. Iech dochte drieb nouch, wos mich an letzten Vortljuhre su ejsn genervt hout, wu ich su richtsch biese wor. Und hotte ou Zeit zun Denkn, wiesu mieh dos su nejsn tote. Leute, amende ös dos ou wos fr euch. Wenn ihr amoul ane holbe Stunde Zeit hout, denkt ock dro, wos ei dr letztzn Zeit besonders schiene wor - odr ou ne. Und iebnleht drnounde, wiesu dos schiene wor und wiesu wos abn ne schiene wor. Abr ejs ös drbeine wichtsch: tut euch salbr ne oschwindln. S possiert jo nischt, wenntr ehrlich seid. Und losst euch ocke Zeit drbeine. Wall ne die orschte Antwort ou de richtsche sein muss. Mojche vu dan Antwortn tun sich vrsteckn und wolln ne gesahn warn. Und dou musste dann ou zwejmoul odr eifersch druf guckn.

Ich soh euch: mier tuts gutt, wenn ich weiß, wos mich zun Drehn bringt wie a Kreisl. Ne, doss ich mich dann nemieh ufreg ei bestömmtn Situationen odr doss ich dann ömmr denke, iech misste mieh ändrn. Nejnej. Su ne. Ich dorf ou wattr denken, doss mr de Fahler ou bei andrn suchn dorf. Obr ich weiß dann ou, wiesu mich die Fahler vu dan andrn su nejsn. Und dann kon ich ieberlehn, wies itze wattr giehn sellte. Bleib ich biese, odr kon ich wos machn, doss dos wiedr gutt wörd? Amende hilft su wos jo ou ei dr Ehe? Schiene wär dos schunt, wenn de wingstns wisstest, wiesu de tischkerierst odr wiesu dich bei denn Monne odr ou dr Froue wos fuxt. S Labn kennte drnounde ou a brickl besser warn.

No dou, wenn ich itze an Oubde ban Biere sitze und allejne bie, dann denke ich ou vill iebn mieh nouch. Wiesu iech wos mache odr ou wiesu iech wos ne mache. Und ich ho de große Hoffnung, doss mich dos a brickl zu enn bessern Menschn machn kennte. Odr doss iech ernewie vrstiehn kon, wiesu menne Fingernahle drecksch sein und wiesu mr dos wichtsch ös. Denn rejne Fingernahle machn doch noch kenn gudn Menschn aus. Mejntr ne ou?
